

# **Акафист Пресвятой Богородице в честь иконы Ея «Абалацкая»**

*20 июля/2 августа, 27 ноября/10 декабря*

## **Кондак 1**

Избранной Предвечным Царем в наше верных спасение небесе и земли Царице, благодарственные похвалы приносим Ти, Богородице! Ты же, яко имущая державу непобедимую и милосердие неизреченное, от всяких нас бед свободи и вся благая нам даруй, да зовем Ти:

Радуйся, Мати Дево, всепетая христиан похвало.

## **Икос 1**

Архангелы и Ангелы поют Тебе, Деве чистой, немолчныя песни на небеси. Мы же, грешнии, на земли преклоньша колена душ и сердец наших пред Пречистым Твоим образом со слезами умиления, бранными устами вопием Ти:

Радуйся, Заступница наша усердная; радуйся, Мати наша премилосердная. Радуйся, славо наша непроходящая; радуйся, богатство наше неистощимое. Радуйся, Помощнице наша непреложная; радуйся, Покровительница наша присная. Радуйся, радости наша, от всякия скверны плоти и духа нас очищающая; радуйся, Целительнице наша, болезней душевных и телесных нас избавляющая. Радуйся, похвало наша, радостей духовных нас не лишаящая; радуйся, Владычице наша, помощь Твоею недуги наша исцеляющая. Радуйся, прибежище

наше, от врагов видимых и невидимых нас покрывающая; радуйся, Святая, святых бóльшая. Радуйся, Мати Дево, всепетая христиан похвалó.

## **Кондак 2**

Видящи в трикратных видениях боголюбивая вдовица Мария всечестнаго лица Твоего, Пресвятая Дево, изображение, ужасом великим одержима, убоясь поведати о чудесных видениях своих людем, в сердце же своем, из глубины души взываше Богу: Аллилуия.

## **Икос 2**

Разум неразумеваемый человеческими помыслы ищущи разумети в чудном явлении пречистаго Твоего, Богоматери, образа, блаженная Мария новаго удостойся видения, в немже великий святитель Николай грозно повеле ей возвестити виденное, она же со страхом и трепетом всем поведа тайну видения своего и всех научи взывати к Богородице:

Радуйся, всех Зиждителя в Твоих ложеснах носившая; радуйся, Бога плотию рождшая, миру Спасителя. Радуйся, в рождестве девство нетленно сохраняющая; радуйся, на земли ангельски пожившая. Радуйся, Бога с человеки примирившая; радуйся, святых всех Пресвятейшая. Радуйся, Дево Пресвятая, дивно явившая нам образ Свой; радуйся, Благодатная, в явлении образа Своего милосердие нам являющая. Радуйся, о всех чтущих образ Твой святы́й промышляющая; радуйся, всем

молящимся Тебе пред святым образом Твоим по мере веры спасение подавающая. Радуйся, чудесы Твоего образа умы наша к горнему миру возводящая; радуйся, Святая, святых бóльшая. Радуйся, Мати Дево, всепетая христиан похвалó.

### **Кондак 3**

Силу Божию ищуще уведети благовернии людие Тобольстии в дивных явлениях образа Твоего, Богомати, собираяся вкупе с архиереем своим Нектарием, да уверятся, яко милосердие Царицы Небесной восхоте посетити и в стране нашей всех, хотящих улучити спасение; уверившеся же и радующеся радостию великою, воспеша Богу: Аллилуия!

### **Икос 3**

Имеючи всеусердно желание стяжати сокровище небесное, святыи лик Твой, Богородице, вси единомушно возжелаша первее своими руками устроить на месте явлений новую в честь Знамени Божией Матери церковь, юже и воздвигоша, со всем усердием воспевающе Царице Небесной:

Радуйся, ангельское великое удивление;  
радуйся, праотеческое дивное утешение.  
Радуйся, пророческая высокая проповедь;  
радуйся, апостольская преславная похвало.  
Радуйся, святителей изрядное украшение;  
радуйся, мучеников крепкое утверждение.  
Радуйся, преподобных спасительное наставление;  
радуйся, постников неизнемогающее воздержание. Радуйся,,

девствующих чистото и славо; радуйся, отцев и матерей тихое веселие. Радуйся, всех православных христиан удобрение; радуйся, Святая, святых бóльшая. Радуйся, Мати Дево, всепетая христиан похвалó.

#### **Кондак 4**

Буря помышлений сумнительных в радостную тишину преложися, егда видевшая в видениях образ Пречистыя Девы Богородицы указа быти его подобием Знамени Новгородския, точию с предстоящима святителем Николаем и Мариєю Египетскою; темже и возопиша вси Богу: Аллилуия.

#### **Икос 4**

Слышав Евфимий, расслабленный телом, но не духом, от некоего старца Павла, еже бы написати явленную икону в новую церковь, созидавшуюся по повелению Божию на Абалаке, потщася вдати дело сие искусному в живописании перводиакону Тобольския кафедры Матфею, егда же образ сей писаше, болящий по малу целяшеся и Богородице усердно пояше:

Радуйся, Царице Небесная, явлением честныя Твоея иконы нас обрадовавшая; радуйся, Мати Божия, чудесным целением от нея нас удивляющая. Радуйся, стране нашей светлое просвещение; радуйся, земли нашей несокрушимое ограждение. Радуйся, по водам плавающим тишино; радуйся, обуреваемым небурное пристанище. Радуйся,

путешествующим легкое прехождение; радуйся, блуждающим милосердная Наставнице. Радуйся, труждающимся благое покоище; радуйся, обремененным тихое прибежище. Радуйся, в бедах сущим скорая Заступнице; радуйся, Святая, святых бóльшая. Радуйся, Мати Дево, всепетая христиан похвалó.

### **Кондак 5**

Боготечней звезде, приведшей иногда волхвов к Солнцу Правды Христу Богу нашему, подобно бысть явление иконы Твоя, Божественная Дево, в пределах наших: видяще бо и молящесе пред нею, праотцы наши из Тебе познаваху Сына Твоего, Спаса нашего, мы же научаемся усерднее пети Ему: Аллилуия.

### **Икос 5**

Видевше людие тобольстии честную икону Божия Матере, явившую чудесное исцеление усердствовавшему написати ю, яко божественное сокровище прияша ю и яко многосветлый светильник поставиша в новом храме, ими созданном, радуящесе и вопиюще к Богородице:

Радуйся, светозарное светило, страну нашу озаряющее; радуйся, спасение душам нашим устрояющая. Радуйся, небесным светом сердца наша просвещающая; радуйся, мир, тишину и благоденствие нам являющая. Радуйся, болящим духовно и телесно здравие подавающая; радуйся, обидимых Своею честною ризою покрывающая. Радуйся, безнадежных известное

надеяние; радуйся, младенцев разум просвещающая. Радуйся, вдовиц и сирот кормительнице; радуйся, нагих одеяние и пленных избавление. Радуйся, просящим помощи скорая Помощница; радуйся, Святая, святых бо́льшая. Радуйся, Мати Дево, всепетая христиан похвало́.

### **Кондак 6**

Проповедницы нелестнии великого милосердия Твоего, Владычице, к людем быша вси приявшии чудесная исцеления от святыя иконы Твоея; вси же слышавшии и видевшии благодатныя токи, изливающиеся обильно от Тебе на страждующих и бедствующих, вкупе с ними радостно воспеваху Богу: Аллилуия!

### **Икос 6**

Возсия благодать от образа Твоего, Дево Чистая, яко солнце пресветлое в пределах наших, лучами чудес, истекающих от него, град наш и вся грады и страны не точию земли сибирския, но и российския озаряющая, сего ради недоумевающе изрещи величие чудес, от иконы Твоея бывших, Богородице, во умилении сердца, верою и любовью вопием Ти:

Радуйся, черною немощию одержимых исцеляющая; радуйся, болящих очами уздавляющая. Радуйся, падучих болезней избавляющая; радуйся, слепым зрение отверзающая. Радуйся, злыя демоны от людей отгоняющая; радуйся, беснующимся здравие подавающая. Радуйся, расслабленных от одра

воздвизающая; радуйся, немым язык и глаголанье возвращающая. Радуйся, от всех лютых недугов врачующая; радуйся, в сонних и видениях страждущим являющаяся. Радуйся, от всяких напастей чудесно свободящая; радуйся, Святая, святых бо́льшая. Радуйся, Мати Дево, всепетая христиан похвало́.

### **Кондак 7**

Хотяй прославить святую икону Твою, Богородице Дево, Сын Твой и Бог наш Господь Иисус Христос, воочию всех излия от нея неисчерпаемое чудес море, в немже вси погружающися с верою и упованием приемлют благодать исцелений и, благодаряще Господа, со страхом и любовию умиленно вопиют Ему: Аллилуия.

### **Икос 7**

Новыя и преславныя чудеса благодати Твоея, Богородице, яви нам Господь, егда святая икона Твоя носима бе по градом и весям страны нашея; мнози бо верующии внезапно исцеляхуся от разнообразных неисцельных недугов, и неверные к вере обращахуся, с удивлением, умилением и любовию воспевая Тебе:

Радуйся, всякие болезни исцеляющая; радуйся, вся недуги отгоняющая. Радуйся, любовию серафимскою присногорящая; радуйся, души и сердца наша любовию божественною воспламеняющая. Радуйся, огонь Божества в Себе вместившая; радуйся, пламене страстей наших изменяющая. Радуйся, от огня греховнаго

верующих в Тя соблюдающая; радуйся, от огня геенскаго любящих Тя избавляющая. Радуйся, от запаления огненнаго жилища наша сохраняющая; радуйся, света Твоего зарями мрак неведения нашего разгоняющая. Радуйся, теплая наша Заступница и усердная к Богу о нас молитвенница; радуйся, Святая, святых бóльшая. Радуйся, Мати Дево, всепетая христиан похвалó.

### **Кондак 8**

Странное видение честныя иконы Богоматери, свыше явленное с предстоящими святителем Николаем и Мариєю Египетскою, разумевше, устранимся, мужие и жены, мира суетнаго, ум к небесным возводяще; сего бо ради и дадеся нам чудная икона Богородицы, да взирающе на ню, горняя мудрствуем, а не земная, вопиюще к Богу: Аллилуия!

### **Икос 8**

Вся еси в вышних, но и нижних не оставляеши, Богородице Дево, чудесы бо Твоими, от святых иконы Твоея, яко от живаго и независтнаго источника, изливающимися, присно нас просвещаеши, верою к Тебе притекающих и зовущих таковая:

Радуйся, нищих духом неистощимое богатство и милостей бездно; радуйся, Мати чадолюбивая, печальных незримое утешение. Радуйся, Голубице кроткая, тихая и незлобивая; радуйся, Горлице благогласная, ненавидимых тайное успокоение. Радуйся, грешников спасение и к



Богу присвоение; радуйся, правоверных всех твердое ограждение. Радуйся, невидимое надеющимся на Тя поможение и заступление; радуйся, ангельский уме, присно зрящий Бога. Радуйся, светозарная звездо умнаго солнца; радуйся, Херувимов и Серафимов славнейшая. Радуйся, Архангелов и Ангелов честнейшая; радуйся, Святая, святых бóльшая. Радуйся, Мати Дево, всепетая христиан похвалó.

### **Кондак 9**

Вся страна наша богохранимая, милостями Твоими, Богомати, благодатствованная, имея икону Твою чудотворную в щит и ограждение от врагов видимых и невидимых, незримою Твоею помощью побеждает вся супостаты своя, Богу же в радости сердца благоговейно вопиет: Аллилуия.

### **Икос 9**

Витийство наше песненное, яко детское немотствование, не довлеет к изглаголанию всех чудес и благодеяний, Тобою, Владычице, явленных и присно являемых нам от дивных иконы Твоея; сего ради недоумевающе благохвалити Тя по достоянию, со смирением взываем Ти:

Радуйся, славящих Тя всегда прославляющая; радуйся, от огня грады и веси наши хождением иконы Твоея сохраняющая. Радуйся, храмы и дома наша иконою Твоею благодатно посещающая; радуйся, молитвы молящихся Тебе к Богу возносящая. Радуйся, рыданий и

воздыханий наших никогда же отметающая; радуйся, пришествием Твоея иконы радости наша усугубляющая. Радуйся, все скорби наша и горькия беды ею улаждающая; радуйся, унывающих Твоим человеколюбием ободряющая. Радуйся, поклоняющимся явленной Твоей иконе радость и здравие подавающая; радуйся, души верных милосердием Твоим умиляющая. Радуйся, радости наша, иконою Твоею святою присно нас утешающая; радуйся, Святая, святых бóльшая. Радуйся, Мати Дево, всепетая христиан похвалó.

### **Кондак 10**

Спасти хотяй род человеческий от вечнаго мучения и дати ему Царство Небесное, человеколюбивый Господь дарова нам, грешным, Матерь Свою в помощь, покров и защищение; буди же нам, о Всеблагая, Помощница, заступница и руководительница во всем житии нашем, и во исходе и по кончине нашей не остави нас, умильно вопиющих: Аллилуия.

### **Икос 10**

Стена еси воистинну необоримая, Богородице Дево, всем к Тебе прибегающим; никто же бо притекаяй к Тебе отходит тощ. Темже ущедряеми милостию Твоею, во умилении души молим Тя: покрый, заступи и спаси всех нас, беспомощных, от всяких бед, искушений и озлоблений, Тебе с любовью взывающих:

Радуйся, крепкая защито возложивших на Тя упование; радуйся, воинству споборяющая.

Радуйся, судиям немздоприемным споспешница; радуйся, наставников и детоводителей вразумление. Радуйся, познания истины чистое зеркало; радуйся, сохранения веры крепкое забрало. Радуйся, всеблагая утешительница несчастных; радуйся, сиротам безприютным покровительница. Радуйся, всех детей благословляющая; радуйся, всякую юность к добру направляющая. Радуйся, всех возрастных в святой жизни укрепляющая; радуйся, Святая, святых бóльшая. Радуйся, Мати Дево, всепетая христиан похвалó.

### **Кондак 11**

Пения и моления наша пред святою и чудотворною иконою Твоею, Тебе возносимая, приимши, благосердная Владычице, заступи, спаси, помилуй и сохрани нас от всякаго злаго обстояния, да тихое и безмолвное житие под кровом Твоим проживем во всяком благочестии и чистоте, из глубины души умиленно воспевая Богу: Аллилуия.

### **Икос 11**

Светоприемную свещу света божественнаго, яко Богородицу и Матерь Света невечерняго, понимающе и почитающе Тя, Пречистая, како возможем изрещи благодатная Твоя озарения, присно текущая от иконы Твоея, яко от солнца лучезарнаго? Обаче озарения Твоего милостиваго, Всеблагая, ищуще, дерзаем воспевати Тебе:

Радуйся, заре незаходима, светом вечным нас

осиявающая; радуйся, луно, от Солнца правды нас облистывающая. Радуйся, светильниче, на свещнице превысшем поставленный; радуйся, свеще неугасимая огня невестественнаго. Радуйся, Мати Света истиннаго, благочестивых души просвещающая; радуйся, свет райския жизни нам источающая. Радуйся, присно блажащих Тя пресветло ублажающая; радуйся, усердно молящихся Тебе светом благодати озаряющая. Радуйся, всякую старость образом святой жизни соделывающая; радуйся, тьму, в нейже язычницы, неверующии, еретицы и раскольницы пребывают, истребляющая. Радуйся, всех грешников светом Твоим просвещающая и к покаянию приводящая; радуйся, Святая, святых бóльшая. Радуйся, Мати Дево, всепетая христиан похвалó.

### **Кондак 12**

Благодати залог давшая нам святую икону Твою, Мати Бога Вышняго, испроси нам у Небеснаго Владыки, Сына Твоего и Бога нашего, благодать Святаго Духа; воздвигни нас из глубины греховныя, просвети сердечныя очи наша к зрению спасения, оживотвори сердца наша духом благочестия и страха Божия, духом чистоты и правды, духом любви и милосердия, да всегда поем Богу: Аллилуия!

### **Икос 12**

Поющи Твоя древняя и новая милости и чудеса, Богородительнице, хвалим Тя вси, яко твердую и надежную предстательницу нашу, со

умилением поклоняемся Тебе, выну молящейся о нас и благотворящей нам; веруем бо и уповаем, яко испросиши и подаси нам вся благая и спасительная, временная и вечная, воспевающим Ти:

Радуйся, непостыдное упование в животе, во исходе и по кончине нашей; радуйся, уповающим на Тя мирен конец живота сего подающая. Радуйся, в день судный наша надеждо и защищение; радуйся, Судии Праведнаго умоление. Радуйся, всех кающихся грешников прибежище и заступление; радуйся, всех праведных славо и утешение. Радуйся, радость выну Тебе приносящих радости вечныя сподобляющая; радуйся, слезная моления наша милостивно приемлющая. Радуйся, покровом Твоим от врагов видимых и невидимых нас покрывающая; радуйся, всех нас, грешных, ко спасению и восприятию благ вечных наставляющая. Радуйся, поклоняющимся иконе Твоей и Тя на помощь призывающим скоро помогающая; радуйся, Святая, святых бóльшая. Радуйся, Мати Дево, всепетая христиан похвалó.

### **Кондак 13**

О Всеблагая Мати Дево, Богородице, присно благодееющая нам во святей иконе Твоей, нынешнее приемши Тебе единой прикладное приношение, от всяких нас бед, напастей и скорбей временных и вечных избави и сподоби нас, рабов Твоих, в селениях райских водворитися, да во вся веки поем: Аллилуия!

*(Этот кондак читается трижды, затем икос  
1 и кондак 1)*

### **Икос 1**

Архангелы и Ангелы поют Тебе, Деве чистой, немолчные песни на небеси. Мы же, грешнии, на земли преклоньша колена душ и сердец наших пред Пречистым Твоим образом со слезами умиления, бранными устами вопием Ти:

Радуйся, Заступница наша усердная; радуйся, Мати наша премилосердная. Радуйся, славо наша непроходящая; радуйся, богатство наше неистощимое. Радуйся, Помощнице наша непреложная; радуйся, Покровительница наша присная. Радуйся, радости наша, от всякия скверны плоти и духа нас очищающая; радуйся, Целительнице наша, болезней душевных и телесных нас избавляющая. Радуйся, похвало наша, радостей духовных нас не лишаящая; радуйся, Владычице наша, помощь Твоею недуги наша исцеляющая. Радуйся, прибежище наше, от врагов видимых и невидимых нас покрывающая; радуйся, Святая, святых бо́льшая. Радуйся, Мати Дево, всепетая христиан похвало.

### **Кондак 1**

Избранной Предвечным Царем в наше верных спасение небесе и земли Царице, благодарственные похвалы приносим Ти, Богородице! Ты же, яко имущая державу непобедимую и милосердие неизреченное, от всяких нас бед свободи и вся благая нам даруй,

да зовем Ти:

Радуйся, Мати Дево, всепетая христиан похвало.

### **Молитва**

О Пресвятая Владычице моя Богородице, милосердия сущи источник, покрове, упование и прибежище христиан! Тебе, всесильней Предстательнице и Споручнице покаяния и спасения моего, аз, грешный раб Твой, вручаю душу и тело мое, входы и исходы моя, веру и житительство мое, кончину и число дней моих, глаголы и помышления моя, дела и начинания моя; Ты же, милостивая Мати Божия, мною руководствуй, покрывай, соблюдай и спасай мя от всех вражеских козней невредимо, да немолчно, до последняго издыхания моего, взываю Ти:

Радуйся, Невесто неневестная! Радуйся, Святая, святых бóльшая! Пресвятая Богородице, спаси мя! Аминь!